

AMMENTOS DE SEDILO

Sa festa de Santa Ittoria

In bidda ch'aiat duas cresias de Santa Ittoria, una fuit intro idda in sa carrela a issa numenada, s'attera in sartos de Tzicori, in sa cunzadura appitzigande a cussa chi dd'est sa puntana de Tzia Rega e s'agatan ancora sos muros arruttos.

Finzas a sos annos trinta Santa Ittoria eniat festada sa die innanti e sa die de Santu Sidore.


A festare fuint solu sas pitzocheddas de doighi o treighi annos, ma calecuna tzia como contat chi issa at festau cando fuit zai sennorina.

Sa die innanti de Santu Sidore sas pitzocheddas si bestiant de sennoreddas, cum bestires e capedditos sestaos e cosios po sa festa, opuru pedios a sas feminas prus ricas de sa idda.

Medas andiant iscurzas, ateras si faiant sas iscrapas cosinde a pare pizos de tela.

Bestias a cussa manera ch'essiant paris a bratzete; sas de Benepadru non sortiant mai cum cussas de Corrupare, ca sas dies si nde cantaiant de onnia colore!.

Ziriant in sas parzas e in sas carrelas frimandesi onnia tantu a ballare e a cantare fintzas a cando sa zente dd'as cumbidiant cum caramellas, druches e ite buffare.



Chiesa di Santa Ittoria 'e Ziccori: planimetria. Disegno da «Sedilo. I monumenti» Tomo II (Sedilo 2).

Su manzanu 'e Santu Sidore andiant a sa Cuffessone bestias de sennoredas, postas in fila a dananti de sos carros mudaos e tiraos dae sos boes.

A s'orta e die, semper bestias gasi, caliant a Santu Antinu po pregare e po sighire sos ballos; siat sas de Benepadru che sas de Corrupare fuint semper iscortadas dae pitzocheddos.

Arribiant prima sas de Benepadru, chi a pustis aere nau su rosariu si che intriant a su muristene chi fuit a costazos de sa cresia a manu manca (in s'annu baranta su muristene che dd'ant bettau po faere su passaditzu chi ch'andat a sa sagrestia).

Sas pitzocheddos comintziant a cantare e a ballare e sos pitzpcheddos si apostaiant isetande sas de Corrupare, ca cando arribaiant ddas "saludiant" cracandedis su crastu.

Sas de Corrupare si frimmiant semper a ballare a cara de sa cresia o in bassu acanta a sa muredda.

Contant chi a pustis sos ballos si printzipitaiant ancora acanta a sa bartza e calecunu joga-joga che eniat bettau a intro a modde.

Tottu custas brìgas duriant solu una die, ca siat sos mascros che sas feminas, de ambos duos ighinaos chi esserent, fuint cumpanzos de iscola si non de bancu.

Sos ballos de sas pitzpcheddas in cussas duas dies fuint pesaos dae sos muttos cantaos dae issas etotu e cumpostos po sa die de Santa Ittoria; sos prus muntovaos fuint: "corigheddu e coro amau - a'nde oddire sa nughe - a'nde oddire s'olia - a'nde oddire s'opinù - a'nde oddire passale" - e ateros.

Medas fuint sos muttetos e ateras boghes chi pesaiant e innoghe nde iscidimus calecunu.

Duos boes nieddos
Bufant abba in su riu
Totu che passat oe
Su nostru sennoriu

Mamma mia su moro in crapetura
Mamma mia su moro in su padente
A bisu meu ch'at beniu zente
A che furare sa tzeraca a fura

Duos boes nieddos
Crocant a bentre a sole
Po ponner sos aneddos
In smaltare mazore

Mamma mia su moro
Si ddu io lu timo
De cantos chi nd'adoro
Unu solu nde istimo

A Corrupare sa carrabatzina
A Benepadru sa pala mazore
A mesu idda su menzus fiore
A Muntonarzu sos atopos

Comare a bos ammentades
De sa nostra pitzinnia
A si fustis e fia
Nessunu b'at a torrare

Bis'appo una columbina
Isfbzande una rosa
Coro meu si fit cosa
De nos cojuare a pare

Sas sennoras de idda
Si mudant a capeddu
Po calare a Mureddu
A piscare ambidda

Sos ogos duas istellas
Sas massiddas duas rosas
E sas lavras duas prellas
Coraddinas preziosas